


აკადემიკოს შალვა ნუცუბიძის დაბადებიდან 130 წლისთავისადმი მიძღვნილი საერთაშორისო კონფერენცია



2018 წლის 14 და 15 დეკემბერს, ივანე ჯავახიშვილის სახელობის თბილისის სახელმწიფო უნივერსიტეტში, ჩატარდა აკადემიკოს შალვა ნუცუბიძის დაბადებიდან 130 წლისთავისადმი მიძღვნილი საერთაშორისო კონფერენცია. მინვეულ სტუმრებს შორის იყვნენ თბილისის სასულიერო აკადემიისა და სემინარიის რექტორი, ფილოლოგიისა და თეოლოგიის დოქტორი, პროფესორი, პროტოპრესვიტერი გიორგი ზვიადაძე, ასევე, ამავე სასწავლებლის თანამშრომლები და სტუდენტები.

თსუ – ში შეკრებილმა საზოგადოებამ შალვა ნუცუბიძის ძეგლი გვირგვინით შეამკო და სასულიერო პირებმა მისი სულის მოსახსენიებელი პანაშვიდი გადაიხადეს. მათ შორის ბრძანდებოდა თბილისის სასულიერო აკადემიისა და სემინარიის მოძღვარი, დეკანოზი აბრაამ სოლომნიშვილი. თსუ-ს მუზეუმში გამოიფინა შალვა ნუცუბიძის ნაშრომები და მემორიალური ნივთები. განსაკუთრებით უნდა აღინიშნოს სრულიად საქართველოს კათოლიკოს პატრიარქ კალისტრატე ცინცაძის მიერ შალვა ნუცუბიძისადმი ნაჩუქარი ბიბლია პატრიარქის ავტოგრაფით: „ორთა ხუცესთა ნაშიერსა და სიბრძნის მოყვარესა ამას სიბრძნისასა მიუძღვნის ხუცესთა უხუცესი – 1951.V.25“.

სხდომის თავჯდომარემ, პროფესორმა დემურ ჯალაღონიამ თქვა, რომ „ქართულ სინამდვილეს არ ჰყოლია ნუცუბიძის რანგის მოაზროვნე, კლასიკოსი ფილოსოფოსი...“ „მან შექმნა ქართული ფილოსოფიური სკოლა“.

ამავე ღონისძიებაზე სიტყვით გამოვიდა პროტოპრესვიტერი გიორგი ზვიადაძე, რომელმაც მადლობა გადაუხადა დამსწრე საზოგადოებას მინვევისთვის და მიულოცა შალვა ნუცუბიძის იუბილე. მან ისაუბრა შალვა ნუცუბიძის დიდი ღვაწლის შესახებ ქართული ფილოსოფიისა და კულტურის წინაშე. ასევე, აღნიშნა მისი ახლო ურთიერთობა სრულიად საქართველოს კათოლიკოს პატრიარქთან, უწმინდესსა და უნეტარესთან ილია II – თან. სიტყვის დასასრულს თბილისის სასულიერო აკადემიისა და სემინარიის რექტორმა დალოცა დამსწრე საზოგადოება.